

Morning Dogri (NSD) National News Bulletin 19-07-2024

आकाशवाणी

- सरकार संसद दे बरसांती आले इजलास च 6 नमें बिल पेश करोग।
- भारत नै 2030 तोड़ी इलैक्ट्रानिक्स समेयान दे विनिर्माण क्षेत्र च कारोबार दा लक्ष्य 500 बिलियन डॉलरें दा रखेआ ऐ।
- सरकार अज्ज नमीं दिल्ली च कीर्ती पैहलकदमी दे दुए गेड़ दी शुरूआत करोग।
- मौसम सरबंधी मैहकमे नै गुजरात, गोवा, महाराष्ट्र, आंध्रप्रदेश ते तेलंगाना च भारी बरखा सरबंधी रैड अलर्ट आली चेतावनी जारी कीती ऐ।
- क्रिकेट च महिला एशिया टी-20 प्रतियोगिता 2024 च पिछली बारे दी विजेता टीम भारत दा मकाबला पाकिस्तान कन्नै होग।

<><><><><><>

Monsoon Session

सरकार अगले हफ्ते थमां शुरू होआ'रदे संसद दे मानसून सत्र च आपदा प्रबंधन अधिनियम च संशोधन सनें 6 नमें विधेयक पेश करोग। सरकार नै वित्त विधेयक दे इलावा नागरिक उड्डयन क्षेत्र च बपार गी सखल्ला बनाने दे मकसद कन्नै 1934 दे विमान अधिनियम गी बदलने आस्तै भारतीय वायुयान विधेयक 2024 गी बी सूचिबद्ध कीता ऐ। लोकसभा सचिवालय आस्सेआ कल संजा जारी संसद बुलेटन च विधेयकें दी सूचि प्रकाशत कीती गई ऐ। संसद दा मानसून सत्र 22 जुलाई थमां शुरू होग, जेहड़ा 12 अगस्त तगर चलोग। वित्त मंत्री निर्मला सीतारमण 23 जुलाई गी संसद च केन्द्रीय बजट पेश करगंन।

<><><><><><>

India Electronics

भारत नै 2030 तोड़ी इलैक्ट्रिक समेयान दे विनिर्माण क्षेत्र च कारोबार दा लक्ष्य 500 बिलियन डॉलरें दा रखेआ ऐ। एह्दे च तैआर माल कन्नै 350 बिलियन डॉलर जिसलै कि घटकें दे विनिर्माण थमां 150 बिलियन डॉलर हासल करना शामिल न।

नीति आयोग दी उपाध्यक्ष सुमन बेरी होरें नमीं दिल्ली च इलैक्ट्रानिक्स-वैश्विक मूल्य श्रृंखलाएं च भारत दी हिस्सेदारी दा सशक्तिकरण सरबंधी रिपोर्ट गी जारी कीता। रिपोर्ट भारत दे इलैक्ट्रानिक्स क्षेत्र दा व्यापक विश्लेषण करदी ऐ ते एहदी क्षमता ते चुनौतिएं पर जोर दिंदी ऐ। एह इलैक्ट्रानिक्स क्षेत्र च भारत गी वैश्विक विनिर्माण केन्द्र दे तौर पर उभरने आस्तै लोड़चदे तौर तरीकें अपनाने बारे रूपरेखा गी पेश करदी ऐ।

<><><><><><>

Khelo India

युवा मामले ते खेड्डें सरबंधी मैहकमे दे मंत्री डॉ. मनसुख मांडविया होर अज्ज नमीं दिल्ली च सरकार दे खेलो इंडिया कीर्ती पैहलकदमी दे दुए गेड़ गी शुरू करोआंगन। मंत्रालय नै आखेआ जे इस पैहलकदमी दा मकसद नमीं प्रतिभाएं दी पंछान करियै विकसित करना ऐ। एहदे कन्नै जमीनी सतह उप्पर प्रतिभाएं दी पंछान करने दी प्रक्रिया च मदाद होंदी ऐ। इस परियोजना राएं 2024-25 तोड़ी सब्बै राज्य थमां 20 लक्ख प्रतिभाएं दा आंकलन करने दा लक्ष्य रखेआ गेदा ऐ।

<><><><><><>

Fastag NHAI

जरनैली शिड़कें सरबंधी भारतीय प्राचीकरण एनएचएआई आस्सेआ गड्डिडएं च अग्गे आले शीशे पर फास्टटैग नेई लाने आले थमां दो गुणा टोल वसूल करोग। प्राचीकरण नै आखेआ ऐ जे जानी-बुज्झियै विंडस्क्रीन पर फास्टटैग नेई लाने करी टोल प्लाजा पर बे-मतलब चिर लगदा ऐ जिस करियै लोकें गी असुविधा होंदी ऐ। प्राचीकरण नै इस सरबंधै च सारी सरबंधी अर्जेसिएं गी व्यापक मानक संचालन प्रक्रिया जारी करियै ऐसी गड्डिडएं थमां दो गुणा शुल्क वसूलने लेई आखेआ ऐ। मुख्य भरै च फैले दे तकरीबन 45 ज्हार किलोमीटर लम्मी जरनैली शिड़कै ते एक्सप्रेस-वे आस्तै तकरीबन इक ज्हार टोल प्लाजा पर शुल्क वसूल कीता जंदा ऐ। मुख्य भरै च लगभग 8 करोड़ राष्ट्रीय जरनैली शिड़कें दा इस्तेमाल करदे न।

<><><><><><>

Air India

दिल्ली थमां सैन फ्रैंसिस्को जाने आली एयर इंडिया दी डोआरी एआई-183 गी तकनीकी वजहें करी रूस दे क्रास्नोयास्क अंतराष्ट्रीय हवाई अड्डे आली भेठा मोड़ी दित्ता गेआ। सोशल मीडिया प्लेटफार्म एक्स पर इक पोस्ट च एहदी जानकारी दिंदे होई एयर इंडिया नै आखेआ जे विमान सुरक्षित तरीके कन्नै तोआरेआ गेआ ऐ ते ओ मेहमानें दा ध्यान रखने आस्तै सरबंधी अधिकारिएं कन्नै कम्म करा'रदे न। एयर इंडिया नै आखेआ ऐ जे साढ़े यात्रिएं ते चालक दल दी सुरक्षा साढ़ी पैहली प्राथमिकता ऐ।

<><><><><><>

IMD

मौसम सरबंधी मैहकमे नै अज्ज गुजरात, गोवा, महाराष्ट्र, आंध्रप्रदेश ते तेलंगाना च भारी बरखा सरबंधी रैड अलर्ट आली चेतावनी जारी कीती ऐ। मौसम विभाग नै आखेआ जे गुजरात, कर्नाटक दे तटीय ते दक्खनी आंध्रप्रदेश दे समुंद्री कंडे, गोवा, मध्य महाराष्ट्र ते तेलंगाना च कल्लै तोड़ी भारी बरखा पौने दी मेद ऐ। तोआई मध्यप्रदेश, विदर्भ, ओडिशा, छत्तीसगढ़ ते उत्तरी कर्नाटक च बी अगले चऊं दिनें तोड़ी भारी बरखा होने दी संभावना ऐ। मैहकमे नै आखेआ जे हिमाचल प्रदेश, उत्तराखंड, जम्मू कश्मीर, लद्दाख, हरियाणा, चंडीगढ़, दिल्ली, पच्छिम बंगाल ते अंडेमान निकोबार च बी अगले चऊं दिनें तोड़ी भारी बरखा होने दी मेद ऐ।

<><><><><><>

Amarnath Yatra

जम्मू दे भगवती नगर आले आधार शिविर थमां 4 ज्हार 821 श्रद्धालुएं दा इक होर जत्था अज्ज बडलै श्री अमरनाथ जी दी यात्रा लेई घाटी लेई रवाना होआ। एह सारे श्रद्धालु 150 गड्डिएं दे काफले च सुआर होइयै अगड़ी यात्रा लेई रवाना होए। इस जत्थे च 3 ज्हार 259 मर्द, 1 ज्हार 482 महिलां, 8 बच्चे, 63 साधु ते 9 साधवियां शामिल न। कुल 4 ज्हार 821 श्रद्धालुएं चा 1 ज्हार 731 श्रद्धालुएं बडले थमां त्रै बजे बालटाल लेई ते 3 ज्हार 90 श्रद्धालु पहलगाम लेई रवाना होए, जित्थुआं ओह अपनी अगड़ी यात्रा लेई रवाना होंगन।

<><><><><><>

Foreign Secretary

विदेश सचिव विक्रम मिश्री होर अज्जै थमां दो दिनें लेई भूटान दे अधिकारिक दौरे पर जा'रदे न। विदेश सचिव दे तौरा पर औहदा संभालने मगरा विदेश दा उंदा एह पैह्ला दौरा ऐ। दौरे दरान ओह भूटान दे राजा कन्नै बी मलाटी करगंन। विदेश मंत्रालय नै आखेआ जे एह दौरा भारत ते भूटान बश्कार उच्च स्तरीय गल्लबात दी परम्परा गी नभाना ते भारत सरकार दी गुआंड पैहले आली नीति गी दर्शादा ऐ।

<><><><><><>

Bangladesh

बंगलादेश च सरकारी नौकरिएं आस्तै कोटा प्रणाली व सुधार दी मंग गी लेइयै छात्रे दे विरोध प्रदर्शन करी राजधानी ठाका ते होरने दुए शैहरे च हिंसा बधी गई ऐ। 1971 च मुख्य दी आजादी आस्तै लड़ने आले वीरे दे संबधिएं आस्तै किश सार्वजनिक क्षेत्र दी नौकरिएं गी आरक्षित करने खलाफ यूनिवर्सिटी दे छात्र केई दिनें थमां रैलियां करा'रदे न। हिंसा करी मैट्रो रेल ते ठाका औने जाने आली रेलवे सेवा रोक दी दित्ती गई ऐ। मोबाइल ते इंटरनेट नेटवर्क बंद करने दा आदेश दित्ता गेआ ऐ। कनून बवस्था गी बनाई रखने आस्तै राजधानी सनें मुख्य भरै च बाडर गार्ड बंगलादेश दे जुआनें गी तैनात कीता गेआ ऐ।

<><><><><><>

Asia Cup

महिला एशिया कप टी-20 प्रतियोगिता च अज्ज श्रीलंका दी दम्बूला थाहर भारत ते पाकिस्तान बश्कार खेड्डेआ जाग। मैच भारतीय समे मूजब संजा 7 बजे शुरू होग। प्रतियोगिता दा पैह्ला मैच अज्ज संयुक्त अरब अमिरात ते नेपाल बश्कार होग। मैच दपैहरी 2 बजे शुरू होग।

<><><><><><>

Fencers

जम्मू कश्मीर दे तलवारबाजे न्यूजीलैंड च होई दी तलवारबाजी सरबंधी राष्ट्रीय मंडल प्रतियोगिता च 1 चांदी दा तगमा ते त्रै कैहू दे तगमे जित्तियै भारत दा मान बघाया ऐ।

इक अधिकारिक जानकारी मूजब हरशित कोहली ते छवि शर्मा नै जेकेएससी दे खेलो इंडिया राज्य केन्द्र च सिखलाई लैती ऐ। श्रिया गुप्ता नै गुजरात दे उत्कृष्टता सरबंधी राष्ट्रीय केन्द्र च सिखलाई हासल कीती। सुफियान वहीद नै पटियाला च सिखलाई हासल कीती।

<><><><><><>